

Lèsnan di Afrika

Katastrófiko. Talbes ningun palabra ta mas apropiá pa usa pa deskribí e situashon na hopi pais afrikano.

Sin duda, un parti di e problema ta e pólisanan deskabeyá di algun gobernante. Por ehèmpel, gobièrnu di Zimbabwe a kore ku tur kunukero ku ta desendiente di e kolonisadónan ingles. Komo resultado, awor tin poko kunukero eksperensíá.

Un otro parti di e problema ta ku sekura ta asotá parti sùit di e kontinente afrikano. Tin potensial ku miones di hende por muri di hamber.

Ma tin un otro faktor ku ta hunga un ròl importante. Asina tantu hende a muri di AIDS, ku e kantidat di trahadó ta skars. Negoshinan, industria, komersio, ekonomianan afrikano ta sufri pa falta di obrero.

Ripitídamente por topa mucha di apenas ocho, nuebe òf dies aña ku ta kuida nan rumannan mas chikitu—nan mayornan i faminan ta morto di AIDS. Tin miles di wérfano na e kontinente, víktimanan di desishonnan immoral di nan mayornan. Kuater di kada sinku morto di AIDS na mundu ta tuma lugá na Afrika.

Por bisa ku na mayoria pais afrikano, tur hende ta òf infektá òf afektá. I e epidemia ta sigui krese.

Un parti di e problema di AIDS na Afrika ta ignoransia. Seksualidat ta un tópiko tabu pa hopi hende. Konsekuensia di esei ta ku poko hende sa mes kiko AIDS ta nifiká..

Nos ku ta biba den e region karibense, mester habri wowo pasobra proporsjonalmente e islanan di Karibe ta e di dos region den mundu mas infektá ku AIDS...despues di Afrika. Loke nos ta mira na Afrika awe por ta nos destino si nos no ta hasi algun kambio? I si nos tin ku kambia pa evitá e destino ei, ki kambio nos mester introdusí?

Riba e punto aki nos tambe por siña un lès for di Afrika. Pasobra na e kontinente afrikano tin un “isla” den un laman di infekshon ku ta ganando e bataya kontra e enfermedat kontagiá for di kontakto seksual. Uganda ta un pais ku ta destaká komo un ehèmpel positivo. Na aña 1995, e porsentahe di infekshon di AIDS entre adultonan tabata 18,5. En kontraste, na aña 1999 esaki a baha te 8,3%...un redukshon di mas ku mitar den no ménos ku kuater aña! E agensia di AIDS di Nashonnan Uni ta raportá, “Uganda ta keda e úniko nashon afrikano ku a logra pone e epidemia menguá.”

Kon esaki a sosodé? Habitantenan di e pais a wòrdu eduká tokante AIDS, kibrando e silensio relashoná ku e tópiko tabú. I esaki tabata kompañá ku instrukshon kon pa evitá di kontagiá e malditu malesa. Kiko tabata e solushon presentá? E no tabata kondon. Tabata **apstenensia te matrimonio i fieldat na bo kasá den matrimonio.**

Ningun pais na mundu ku ta promové kondon ta mira kambio positivo asina! **Di bèrdat, promoviendo kondon komo e solushon, AIDS a krese for di insidentenan isolá pa bira un epidemia mundial dentro di 22 aña!**

Nos Kreador a duna nos reglanan kon pa biba, pasobra E ke nos bon. Apstenensia di tur kontakto seksual promé ku matrimonio i fieldat den matrimonio ta e úniko solushon pa AIDS...i tur e otro enfermedatnan venérikó. Ta pesei Dios ta bisa, “No laga immoralidat òf kualke sorto di impuresa...ni wòrdu mentá mes meimei di bos” (Efesionan 5:3). Un di e Dies Mandamentunan ta bisa ketu bai, “No kometé adulterio” (Eksodo 20:14).

Bo tin e libertat pa skohe pa obedesé e mandamentunan di Skritura òf ignorá nan. Ma bo no ta liber di kosechá e konsekuensianan di bo desishon. Ta keda na bo si bo lo siña e lèsnan di Afrika.